

Nobatonan Quick Boys ta elimina tercer club den Eredivisie di e Copa Hulandes

(NLTimes)—E nobatonan di Quick Boys ta e sensacion di e edicion actual di e KNVB Cup. Despues cu e club amateur di Katwijk a elimina clubnan den Eredivisie Almere City FC y Fortuna Sittard, e equipo di coach Thomas Duivenvoorden tambe tabata demasiado pa SC Heerenveen. E wegá a caba den un victoria 3-2 pa e equipo na cas despues di tempo extra.

Esaki ta haci Katwijk e segundo club amateur despues di Noordwijk den e ultimo ocho di e torneo di copa. Mas trempan, AZ, PSV, Go Ahead Eagles, FC Utrecht, Feyenoord y Heracles Almelo tambe a cualifica pa e cuarto-finalnan. Ayera atardi tempo di Hulanda a tuma luga e wegá pa kibra empate.

Keeper Andries Noppert a



tuma e culpa pa SC Heerenveen su eliminacion for di KNVB Cup. “Mi mester tin berguensa y mi tin tambe. Den mi opinion, esaki ta inacceptable,” el a bisa riba ESPN.

Noppert a drenta wegá den luga di prome keeper Mickey van der Hart dies minuut prome cu e fin di tempo regular ora SC Heerenveen tabata adelanta 2-1. Esey a

ser planea di antemano caba, Noppert a bisa. “E tabata un escenario cu nos a tuma na cuenta. Si nan tabata hungando long ball, mi lo drenta. Ta obvio cu esaki no a cana manera debe ser. Falta di ritmo no ta excuus, mi mester a duna miho prestacion. Bo mester ser critico cu bo mes. Mi ta drenta y mi mester demostra mi mes. Si bo no por haci’e, ta cla,” segun e ex-

keeper di Oranje, ken ainda ta anticipando un transfer e aña aki. Club Argentino San Lorenzo a firma pa e keeper. E wegá mester a stop net despues di un minuut pa referi Alex Bos despues cu klapchi a zona pafo di stadion cu a causa un nubia di huma riba veld. E retraso no a dura mucho. E wegá a resumi solamente cinco minuut despues.

E prome chens a bin pa Ravelino Junte, ken no a logra scapa keeper di Heerenveen Mickey van der Hart for di distancia cerca. Quick Boys a tuma e avance den e di 37 minuut. Neville Ogidi Nwankwo a dal un cabezasó pa e tiro di skina di Jesse Reinder. No tabata un sorpresa cu e prome gol a bin for di e banda ey. Heerenveen, e equipo di coach Robin van Persie, no a logra ni un solo tiro den gol te despues di

half-time.

Despues di e break, ta parce cu Heerenveen a avansa. Ilias Sebaoui a tira e bala den skina, scapando keeper Lars Jansen for di e punta di area di pinalti: 1-1. 15 minuut prome cu e fin, e equipo Frisio a tuma e avance. Ion Nicolaescu a dal cabezasó den un paso for di Alireza Jahanbakhsh. Tur cos a parce bon te ora cu un foul pa e keeper sustituto Andries Noppert riba Lukas Hamann a duna e equipo na cas un tiro di pinalti. Esey a parce demasiado estricto como castigo, pero Milan Zonneveld a logra hinca 2-2 y yuda su equipo pa tempo extra.

Levi van Duijn a scapa e keeper dudoso Noppert y fiesta a cuminsa den Katwijk no mucho rato despues. Potret di Koen van Weel/ ANP.

OCA cu prome competencia Internacional pa 2025



Organisacion Caballista Arubano ta den preparacion pa e prome feria internacional pa e aña aki. Tin un cantidad di riba 20 cabay di Corsou cu a haci test di sanger pa por bin Aruba pa e competencia aki cu ta carga e nomber Gran Clasico Internacional.

Hunto cu e gran cantidad di cabay aki tambe ta spera un

delegacion numeroso di Jinete & Amazona di Corsou pa enfrenta esnan di Aruba den competencia. Lo tin 3 dia di competencia, caminda lo inicia diabierna 31 di januari cu algun categorianan sigui despues pa un Welcome Party. Diasabra ta sigui tur e otro categorianan clasico di cabay. Diadomingo lo tin competencia di Jinetes & Amazonas den categoria Principiante y Regular.

Aruba Bank ta patrocina buki pa reparti entre scolnan basico



Aruba Bank ta orguyoso di anuncia su patrocinio di e buki nobo pa muchanan “Rene su dushi wegá” scirbi pa Ruthy “Lady Ruth” Vrieswijk-Bergen. E buki aki lo ser reparti entre scolnan basico pa alumnonan di tercer klas pa asina inspira lectornan chikito y promove lesamento riba nos isla.

E presentacion y bautismo oficial di e buki a tuma lugar na UNOCA dia 15 di januari 2025. E evento aki a celebra e lansamento di e buki, scirbi pa captura e imaginacion di mucha mientras ta stimula e amor pa lesa. Esnan presente tabata tin e oportunidad pa topa cu e autor y pa asina haña su firma den



nan buki.

E iniciativa aki ta cuadra cu e compromiso di Aruba Bank cu ta kere den e desaroyo di lesamento y educacion den nos comunidad. E banco ta kere cu inversion den e educacion di nos muchanan ta un inversion den e futuro di Aruba.

E donacion di Aruba Bank lo percura cu alumnonan di un scol basico na Aruba por tin acceso na “Rene su dushi wegá”, cu ta conta un historia inspirante tocante e felicidad di un mucha su infancia y balornan. E buki lo ta disponibel tambe pa cumpra den “boekhandel” nan rond nos isla.